



Synfocity = 699

mail us at : mzsinfo@gmail.com; mizoramsynod@gmail.com - Phone - 2314648

August 23, 2018

□ Presbyterian Bible School Farewell & Dedication

Vawiin (Aug. 23, 2018) chawhnu dar 1 khan Presbyterian Bible School (PBS) chuan Batch 43-na te chuan Synod Conference Centre-ah Farewell & Dedication programme an hmang a. Synod Moderator Rev. F. Lalrinnunga'n kaihruiin hunserh a hmang a, thuchah sawiin PBS zir chhuakte chu ÷awngtaain Pathian hnenah a hlan a ni. Rev. P.B. Lalmalsawma'n inlawmna leh inhmelhriattirna hun hmangin PBS Principal Rev. Lalneihvura'n reports a pe a. Synod Secretary Upa R. Dengzikpuia'n zir chhuakte hnenah certificates a hlan a ni. PBS Comt. member Rev. R. Lalengmawia'n Exam-a ti ÷hate leh class kal ÷hate hnenah lawmman a hlan a, Upa C.B. Thanghluta'n ÷awngtaisakna hun a hmang a, Senior Executive Secretary Rev. Lalramliana Pachuau leh zirlai aiawhin thu tawi an sawi a, Pu C. Awithanga chung ten C. Awithanga Award an hlan a. Pu C. Awithanga Award hi kum 2014 a÷ang khan subject 3 - Christian Theology, Church Administration leh PCI Constitution-a marks hmu sang berte hnenah pawisa fai Rs.1,000/- ÷heuh hlan ÷hin a ni. Rev. H. Lalrinmawia'n zirtirtute aiawhin lawmthu a sawi a, inkhawm hruaitu Moderator-in malsawmnain inkhawm a ÷hin a ni.

PBS batch 43-naah hian zirlai 52 an nei a, 1st. division-ah 40, 2nd. Div-ah 5, 3rd. div-ah 1 an passed a, simple pass 1 a awm a, exam lo 3 an awm a ni. Class kal kim lawmman la zirlai 15 an awm a. Exam-a ti ÷ha ber pathumte chu:-

Pakhatna - Angela Rosangkimi d/o Zohmingthanga, Bethlehem Kohhran, Aizawl

Pahnihna - Lalsangzeli d/o Lalvulluaia, Mamit Dinthar Kohhran

Pathumna - Lalrambeiseia s/o Rozuala, Sailulak Kohhran te an ni a.

Pu C. Awithanga Award dawngtute chu-

1) Christian Theology subject-ah Lalrambeiseia s/o Rozuala, Sailulak (95%)

2) Church Administration & PCI Constitution subject-ah R. Lalhmangaiha s/o Upa Lalrinsanga, Melriat te an ni. (95%)

□ Sùna : Rev. Lalawmpuia Hmar, Kum 40

Rev. Lalawmpuia Hmar (40), Aizawl Civil Hospital Chaplain hna thawk mek chu August 19, 2018 tlai dar 3:30 khan Synod Hospital, Durtlang-ah a thi a, Aug. 20, 2018 chawhnu dar 1:30 khan Electric Veng Kohhran Biak Inah Rev. Lalramliana Pachuau, Ex-Moderator in a vui.

Rev. Lalawmpuia Hmar hi Pu J.L. Varparha (L) leh Pi Lalbiakluangi te fa 4 zinga a naupang ber dawttu a ni a. April 6, 1978 khan Civil Hospital, Aizawlah a piang a. A pianpui unau mipa 2 leh hmeichhia 1 a nei a ni.

Kum 2002 - 2006 chung khan Aizawl Theological College ah B.D. a zir a, B.D. a zir lai hian a pa Pu J.L. Varparha chuan Chatuan ram a pansan a ni. Kum 2006 Synod Inkhawmpuiin Pro. Pastor-ah lain North Hlimen Bialah a dah a; hetah hian kum 2007- 2009 thleng a awm a ni. Dec. 18, 2009 khan Vanlalremruati, North Hlimen nen an innei a, tunah hian fapa pakhat H. Rotluangpuia (kum 7-na kal mek) an nei a ni.

Kum 2009 Synod Inkhawmpuiin Pastor atan nemnghetin kum 2010 - 2015 chungin Unnao Pastor Bial, Lucknow Field-ah Pastor-in a awm a. Kum 2015-ah Phainuam Pastor Bialah a awm a, 2015 Synod Inkhawmpuiin Synod Office-ah awm turin a ruat a, Synod Officer's Meeting hmasa ber chuan kum 2016 atangin Aizawl Civil Hospital Chaplain turin a dah veleh ta a; chu chu a thih ni thlengin a thawk a ni.

Kum 2015 February thla khan Thin (Liver) natna a nei tan tih hriat chhuah a ni a, theih ang anga inenkawlin Christian Medical College & Hospital, Vellore leh Synod Hospital Durtlangah wawi engemawzat enkawl a ni a, natna dang Zunthlum, B.P. sang leh Lung natna te a neih belh zel a. A nat kar lakah hian Civil Hospital-a a rawngbawl na chu a theih ang angin a thawk chhunzawm ve hram hram zel a ni. Thla khat vel kalta atang khan khawihli te tak te te a nei ÷an a, harsatna erawh chu a tawh pah lutuk lova, a hnaah te pawh kalin Civil Hospital OPD-ah te a inekawl pah reng a, kar khat chung velin inhnaih takin hmun li-ah khawihlipui a nei a, hei hi a chauh pui viau mai a, August 19, 2018 zing khan a thaw a hah a, Synod Hospital-ah kalpui nghal a ni a, ICU-ah awm nghalin ventilator pek a ni a, tha leh mai tura kan beisei laiin August 19, 2018 tlai dar 3:30-ah a rawngbawlsak ÷hin a Lalpa hnenah a chawl ta a ni. *For more - visit www.mizoramsynod.org*

□ Zin

Aug. 20 - 30, 2018 chung hian Field hrang hrang - Arunachal East, West leh North-ah te Field Committee-in Rev. B. Sangthanga, Executive Secretary a kal.

Contd...

☐ **SL&PB**

- ♦ Aug. 22, 2018 (Nilaini) khan Bungkawm Bialah Literature Seminar neih a ni a, Seminar neihpui hian Rev. Dr. C. Chawngmingliana, SL&PB Editor leh Upa H. Ronghaka, SL&PB Additional Editor te an kal. SL&PB-in Literature Seminar a hmanpui tawha kohhran mite kal that ber tum a ni hial a, mi 516 lai an kal thei a. Seminar hi Bungkawm Bial Chairman Upa F. Lalthanmawian a kaihrui a, 'Literature pawimawhna leh thu ziak rawngbawlna' tih thupui, lehkhabutēa buatsaih chu Rev. Dr. C. Chawngmingliana'n a chhiar hmasa a, chumi hnuah "Kohhrana Mizo tawngkam hman leh hla thu lam dan chungchang" tih thupui Upa H. Ronghaka'n a chhiar leh a. Sawihohna hun hlimawm tak hman zui a ni. SL&PB hian kumin chhungin Pastor Bial 10 atangin Seminar hmanpui tura sawmna a dawng tawh a, heng Bial - Zonuam, Keitum, Bairabi, Baktawng, Biata leh Bungkawm nah teah hian Seminar hman tawh a, heng bakah hian sawmna tihhlawhtlin tur hmachhawp an nei nual bawk. Kohhran bakah Kohhran Hmeichhia leh KTP te atang pawhin Literature Nite leh Literature Campaign hmanpui tura sawmna an dawng thin bawk a, hengte hi SL&PB chuan a theih ang angin a tihlawhtling thin a ni.
- ♦ Aug. 25 & 26, 2018 chhung hian Darlawn Bialah Literature Seminar neih a ni dawn a, Upa H. Ronghaka, SL&PB Additional Editor leh Rev. R. Laldinthara te an kal ang a, Pathiannah Bial chhung kohhran hrang hrangah hun an hmang nghal ang.

☐ **PRESCOM**

- ♦ Aug. 21 - 24, 2018 chhung hian Shillong-ah Writers Workshop neih a ni a, Workshop-ah hian Rev. Lalbiakchhunga Pachuau, i/c Shillong Bial, Pu Lalniliana, Bookroom Manager, Pi Lalngkhakliani, Asst. Coordinator, Synod Office leh Pi Rinsailovi, SL&PB Asst. Editor te an kal.
- ♦ Aug. 24, 2018 (Zirtawpni) chawhma dar 10:00 hian Synod Press Gathering Machine thar chu Synod Senior Executive Secretary Rev. Lalramliana Pachuau-in Pathian hnenah hlanin a hawng ang. He khawl thar hi Muller Martin Company, USA siam niin Rs.15,00,000/- man zet a ni a. Hetiang khawl hi Mizoramah a la awm ngai lo va, Synod Press tan hmasawmna nasa tak a nih beisei a ni.

☐ **Synod Social Front**

- ♦ Aug. 24 - 26, 2018 chhung hian Khawzawl Venglai Bialah Political Education Seminar leh Campaign neih a ni dawn a, Pu R. Lalnuntluanga, Coordinator, Rev. Zoramsanga leh Upa Dr. Lalnundanga te an kal ang a, Pathiannah Bial chhung kohhran hrang hrangah hun an hmang nghal ang.
- ♦ Aug. 24 - 26, 2018 chhung hian Khanpui Kohhranah Political Education Seminar leh Campaign neih a ni dawn a, Resource Person te - Upa Lalbiakzuala leh Upa C.H. Thangkhuma te an kal ang.

☐ **Kohhran Hmeichhia**

Aug. 22, 2018 (Nilaini) nileng khan Kohhran Hmeichhe Rorel Inkhawmin a lo rel tawh ram pum huap awmni kham tawngtai rualna hun an hmang a, mahni kohhran theuhah a remchan dan anga hman a ni a, remchan zawkna avanga a hun sawn hma leh tlai hret pawh an awm bawk a. Tawngtai thupui ruahmansa - Lawmthu sawina, Mahni inhlam tharna, Sual thupha chawina, Kum 2018 MLA General Election lo awm tur atan, Ram leh Hnam tan, Zirtirna diklo laka fimkhurna, Kohhran pum rawngbawlna atan, Kohhran Hmeichhe rawngbawlna atan, Ramthar rawngbawlna lam, Sual bawiha tangte tan leh rualban lo, fa hrah leh kum upa te tan tih thupui hrang hrang te hmangin tawngtaina rualna hi neih a ni.

Tawngtai rual denchhen hian Aug. 21, 2018 (Thawhlehi) zan khan Presbyterian Women Fellowship (PWF) Day of Prayer pualin thupui inang tlang "Danglamna thlen turin huaisen rawh" tih an zir ho bawk a ni. Awmni khama Tawngtai rual leh PWF Day of Prayer programme hmang kawp nghalte pawh an awm bawk. Mizoram chhung bakah Kolkata, Delhi leh Mumbai Kohhran Hmeichhiate chuan Awmni khama tawngtai rual hun hi tha takin an hmang thei bawk a ni.

☐ **KTP**

- ♦ Aug. 24 - 26, 2018 chhung hian Ngopa Bialah Music & Literature Night hmanpui turin T.Upa Rochungnunga, General Secretary leh committee member Tv. Robert Lalduhzuala te an kal ang.
- ♦ Aug. 24 - 26, 2018 chhung hian Bilkhawthlir Bialah Leadership Training neihpui turin T.Upa Ricky Lalrammawia Ralte, Asst. Secretary leh Upa Lalnuntluanga, committee member te an kal ang.

☐ **FG&CC**

Aug. 24 - 26, 2018 chhung hian Vangtlang Kohhranah Kristian Chhungkaw Seminar leh Campaign neih a ni dawn a, Rev. Lalsangbera, Director, FG&CC leh Rev. R. Lalengzauva te an kal ang.

☐ **Campus Ministry**

Aug. 16, 2018 (Ningani) khan Govt. Aizawl West College-ah hun an hmang a. Director Rev. Lalchungnunga'n hun hmangin "Pathian chungchang - A inpuanna famkim Kristaa kan hmuh dan" a sawi a. Aug. 20, 2018 (Thawhtanni) khan Govt. KM High School-ah hun an hmang leh a, Director Rev. Lalchungnunga'n "Pathianin he khawvelah hian chhan (purpose) neiin min dah a, min dah chhan hre Chiang turin mahni zawn theuhah tan lak a ngaih thu' a sawi a ni.

☐ **Revival Deptt.**

♦ Aug. 7 - 11, 2018 chung khan Synod Revival Camping Centre, Neibawihah Camping neih a ni a, Speaker Pu C. Lalahawma, Hnehna Puangtu Team a ni. Camp-a lut zawng zawng hi mipa 173 leh hmeichhia 17, an vaiin 190 an ni a, engemaw harsatna thil avanga camp awm thuan thei lo an awm bawk. Camp-ah hian kohhran hrang hrang leh veng hrang hrang 36 atangin an lut a ni. Camp chungma mawhphurhna hrang hrang hi Sihphir Pastor Bial ten an buaipui a ni.

♦ Synod Revival Speaker-ten hetiang hian Camping/Crusade neiin hun an hmang ang:

Aug. 28 - Sept.3, 2018	Upa Lalchhanhima Hnamte, Speaker	Pamchung KH	Crusade
Sept. 4 - 10, 2018	Upa Lalchhanhima Hnamte, Speaker	Rabung KH	Crusade
Sept. 9 - 23, 2018	C. Lalfamkima, Speaker	Mamit Hmunsam	Camping
Sept. 23 - 30, 2018	Lalremruata Sailo, Speaker	Lawngtlai Bethel KH	Crusade

☐ **Prison Ministry**

Aug. 24 - 26, 2018 chung hian Champhai District Jail-ah Crusade neiin hun an hmang dawn a, Speaker tur chu Tv. C. Lalmingsanga, Krista Chhuangtu Team a ni.

☐ **Synod-in chhawmdawlna pe**

Tun hnaia harsatna hrang hrang neite hnenah Synod Relief Fund atangin chhawmdawlna hetiang hian pek an ni.

S.No	Khua	Pek chhan	Chhungkaw zat	Chhawmdawlna pek zat
1.	Meidum Vengthar KH	Leimin tuar	-	Rs. 2,00,000/-
2.	Tlangnuam West	Leimin tuar	1	Rs. 10,000/-
3.	Nisapui	Damlo	1	Rs. 8,000/-
4.	Maubawk Sikul Veng	Damlo	1	Rs. 8,000/-
5.	Maubawk	Damlo	1	Rs. 8,000/-
			TOTAL	Rs. 2,34,000/-

☐ **Hruaina Eng FM Radio**

♦ **AUGUST 24, 2018 (FM Zoawi Aizawl & FM Lunglei @ 7:30 p.m.):**

Zaipawl : Tuikual Pastor Bial Zaipawl - Vuina tur reng a awm lo, Solo : Lalhlumawii - Thisen a thiltihtheihna, Thusawi : Upa K. Vanlalnghaka - Tleirawlte mizia leh enkawl dan, Zaipawl : Mizoram Synod Choir - Isu ka hmangaih che, Group : KTP Kanan Branch Female Voice - lo kir leh rawh

☐ **Hruaina Eng TV Programme**

Susamachar Prasaran Programme

♦ **AUGUST 26, 2018 (Pathianni) 5:00 pm. :**

Group/Choir/Solo : Durtlang Kohhran Masihi Sangati - Halleluia Stuti, Group/Choir/Solo : Chanmari Masihi Sangati - Jisu Tomai, Sermon : Zohmingthanga - Prabhu Yesu Hamare Vishram Sthal, Group/Choir/Solo : Hmingtea Tochwawng - A nugra ha kari, Group/Choir/Solo : Melthum Masihi Sangati - Krista Zara Unau

♦ **AUGUST 26, 2018 (Tv Programme) @ 4:00 - 6:00, 8:00 - 9:00 p.m) :**

Sermon : Rev. J. Lalbiaknia - Ram siam that, Weekly Round Up, Sawihona : Kohhran leh Politics - II

Kohhran Pavalai Pawl Flag leh Logo (Emblem) chungchang hriattirna

Kohhran Pavalai Pawl Logo leh Flag chungchanga rawtna hrang hrang atangin Revival Committee chuan a thlang fel ta a. Thehluh zing atang hian Tv. Vanlalruata leh Upa K. Lalhunpuia, Durtlang North a mite buatsaih chu tlema siam remin thlan a ni a. A duh apiang tan Logo hi Synod Official Website lamah download theiha dah a ni a. Tin, Flag hi LA Garment, Chanmari-ah a duh apiangin mahni Kohhran hming emaw Pastor Bial hming nena chhut lan turin order theih a ni ang. LA Garment nen hian Agreement sign a nih angin Flag hi man tlawm zawkin a print tir theih dawn a, size pangngai Rs. 550/- a ni ang a, Car Flag Rs. 30/- a ni ang. Anni hi Chanmari YMA Hall hnuaiah an awm a, a duh tur chuan an Phone no. 9774395219 -ah emaw 2348248 ah te biak pawh mai tur a ni. Tin, Inkaihruaina Bu pawh lam theih turin peih a ni tawh a. Revival Office-ah bu khat Rs. 5/- in lam theih a ni ang. Hre chiang duh chuan Synod Revival Office-ah zawhfiah theih a ni e.

HRATTIRNA

Synod rorel bawhzuiin tunah hian Bawngkawn Synod Bookroom pawnah Letter Box dah a ni a, lehkha pawimawh Synod Office thleng tur chiah dah tur a ni a, Synod Office ni lo, Deptt. dang thleng tur erawhchu dah a remchang lo a ni. Letter Box hi kar tin Nilaini leh Zirtawpni-ah te hawn thin a ni dawn a ni.

Synfo Praise On 2018 chungchang Hriattirna

Praise On 2018 hi Kristian Thalai Pawl Bial/Branch behchhanin Beat Group Intihsiakna anga kalpui tur a ni a. A kalphung tur hetiang hi a ni:

a) TEL DAN TUR :

1) Kristian Thalai Pawl (KTP) Branch emaw Bial emaw aiawh tur Beat Group 2 aia tam lo an tel thei ang.

2) Beat Group pakhat-ah member 6 aia tam lo an awm thei ang.

3) A tel turte chu KTP Member, Kohhran dan chhunga awm, rawngbawlinaa hman chhonzawm theih tur ni se.

b) ROUND AWM DAN TUR :

1) Round 3 a awm dawn a, Round 1-ah hian Group tinin minute 10 aia rei lo hun an nei ang a; hei hian instruments siam rem chhung leh an zai zawh hun thleng a huam ang.

c) INSTRUMENTS :

1) Tingtang (Guitars), Keyboard leh Drums te chhawp sa a ni dawn a. Guitar leh Keyboard hi mahni ta hmang duh tan a hman theih baw k ang.

d) A hun leh hmun

1) Hming pek luh hun hnuhung : September 7, 2018 thleng.

2) 1st Round : September 18-21, 2018 (Chhun lam)

2nd Round : October 16-19, 2018

Final Round : November 6-9, 2018

e) A hmun : 1st Round hi Synfo Studio-a neih tura ruahman a ni a. A bak hi chu la ngaihtuah leh tura dah a ni. Synfo Praise On 2018 Intihsiakna kalphung tur hriattirna hi Kristian Thalai Pawl Bial leh Branch hrang hrangah thawn chhuah mek a ni.

Kohhran Pavalai Pawl (KPP) inkaihruaina



Kohhran Pavalai Pawl Flag leh Logo hrihfhahna.

1. Flag chungchang.

1) Kil li nei a ni ang.

2) A vang lam chu a dunglam hmun thuma thena hmun hnih (2/3) a ni tur a ni.

3) Rawng chi khat a ni ang a, a rawng atan rangkachak rawng (Creamy Gold Paint color) a ni ang a. Hei hian chhungkuuaa pavalai te pawimawhna, hlutna leh thuneihna a entir a ni.

4) Flag laiah KPP Logo(Emblem) dah tur a ni a. Chumi hnuai lamah Kohhran/Pastor Bial hming hawrawp дума ziah tur a ni ang.

5) A hlai zawng chu chi thuma siam theih a ni ang a. A hlai Ber chu khaikhawmtu committee flag a ni ang a, Ft. 4x6 a ni ang. A dawttu chu Pastor Bial leh Kohhran mal flag a ni ang a, Ft 2.5x3.9 a ni ang. Tin, motora tar leh tul danga hman atan te deuh zawk, 6Inch.x9 Inch. a siam tur a ni ang.

2. Logo (Emblem) chungchang.

1) Logo hi size hrang hranga siam theih a ni ang a, a pian hmang erawh tihdanglam loh tur a ni ang.

2) Rin bial siamna, a tlang a дума rin chhung hi rawng dum pawl hman tur a ni.

3) Rin bial chhung bik background hi gray colour hman tur a ni ang.

4) Thuro thlawk lai hian Thlarau Thianghlim kan zinga thawk a, min hmu rengtu leh tiharh thar thintu a nih a entir.

5) Biak In leh Kraws hian Kohhran leh a rawngbawlinaa ngaih pawimawhzia a entir.

6) Bible in keu leh meialh hian Pathian thua inngat chung zela chhungkaw maichama mei chu a mit tur a ni lo tih a entir.

7) Rin bial in zawm lohna laia bial pathum awm hian Kohhran Pavalai te thil tum pathum a entir.

8) Rin bial hnuai lamah hian Logo neitu chu Kohhran Pavalai Pawl a ni tih tarlan a ni a. Ribbon a thangchhuah diar hman hian Krista tana thangchhuah tur kan ni tih a entir.

9) Rin bial chhung chung lama Thlarau Thianghlim entirna Thuro chung a KPP thupui ziah hian Thlarau Thianghlim puihnaa Krista tana nung tur kan ni tih a entir.

Synod Social Front Helpline: 9089777129;

Tuai & Patil Helpline : 8729800130;

Students' Helpline : 9856883377

www.MIZORAMSYNOD.ORG

Synod Information & Publicity

Phone - 2314648

Synfo